

Sebar luaskan eksport mindset



MENTERI Sumber-Sumber Utama dan Pelancongan, Yang Berhormat Dato Seri Setia Awang Haji Ali bin Haji Apong semasa menyampaikan Kuliah Melayu Islam Beraja (MIB) bertajuk 'Pembangunan Ekonomi Negara dalam Merealisasikan Wawasan 2035'.

Siaran Akhbar dan Foto : Universiti Islam Sultan Sharif Ali

BANDAR SERI BEGAWAN, Rabu, 1 Februari. - Visi dan misi Kementerian Sumber-Sumber Utama dan Pelancongan (KSSUP) adalah menerajui pertumbuhan keluaran industri sumber-sumber utama dan pelancongan.

Ini semata-mata untuk menjadi penyumbang yang signifikan pada pertumbuhan Keluaran Dalam Negara Kasar (KDNK) dengan menggalakkan pelaburan dari dalam dan luar negara, di samping memberi penekanan pada peningkatan produktiviti, penggunaan teknologi tinggi serta memfokus pada pasaran eksport.

Perkara tersebut telah dijelaskan oleh Menteri Sumber-Sumber Utama dan Pelancongan, Yang Berhormat Dato Seri Setia Awang Haji Ali bin Haji Apong semasa menyampaikan Kuliah Melayu Islam Beraja (MIB) bertajuk 'Pembangunan Ekonomi Negara dalam Merealisasikan

Wawasan 2035'.

Menurut Siaran Akhbar Universiti Islam Sultan Sharif Ali (UNISSA), Kuliah Khas MIB anjuran universiti berkenaan melalui Pusat Penataran Ilmu dan Bahasa (PPIB) di auditorium universiti berkenaan.

Dalam kuliah tersebut, Yang Berhormat menyatakan kelembapan ekonomi yang dihadapi, jika berterusan bererti hasrat untuk mencapai Wawasan 2035 mungkin akan tergugat.

Menurutnya, kemakmuran negara yang berdaya tahan bukan terletak pada besarnya sektor kerajaan, tapi pada kukuh dan tumbuhnya keluaran sektor swasta.

"Kunci utama pertumbuhan KDNK ialah peningkatan produktiviti (teknologi pengeluaran) dan kejayaan produk kita menembusi pasaran eksport," tegasnya.

Eksport *mindset* patut

disebarluaskan, jelasnya lagi, bukan sahaja dalam kalangan pengusaha-pengusaha dalam negara, malah dalam kalangan penggubal dasar, pihak *regulator* dan kepada semua peringkat masyarakat.

Yang Berhormat yakin pengangguran yang tinggi sekarang patut menjadi pendorong kepada belia untuk tidak terus bergantung pada sektor kerajaan sahaja.

Seterusnya beliau juga menyarankan para belia untuk menimba ilmu (ICT dan ilmu perniagaan), lebih *versatile* dan produktif, perlu bersedia berkerja dengan pihak swasta atau bekerja sendiri serta mengambil peluang dari kemudahan ICT bagi mengendalikan urusan kerja mahupun perniagaan.

Tujuan kuliah untuk mengetahui kedudukan ekonomi negara yang perlu diketahui pada masa kini dan jalan atau cara untuk membangun Negara Brunei Darussalam.

Kursus MIB yang ditawarkan kepada mahasiswa / mahasiswi

UNISSA dikategorikan sebagai kursus wajib universiti.

Ia bertujuan untuk mendukung dan merealisasikan visi serta misi UNISSA.

UNISSA memandang berat akan peri pentingnya MIB dan diharap akan dapat memberi kefahaman serta penghayatan kepada setiap mahasiswa juga mahasiswi tentang pengertian MIB dengan menekankan tentang kedudukannya sebagai falsafah Negara Brunei Darussalam.

Seramai 187 mahasiswa / mahasiswi Tahun Pertama juga mahasiswa / mahasiswi Fakulti Ekonomi dan Kewangan Islam (FEKIm) menghadiri kuliah berkenaan yang telah dipengerusikan oleh Dekan FEKIm, Dr. Abdul Nasir bin Haji Abdul Rani.

Hadir sama mendengarkan Kuliah Khas tersebut ialah Rektor UNISSA, Dr. Haji Norarfan bin Haji Zainal; Penolong Rektor UNISSA, Pengarah PPIB, pegawai-pegawai dan kakitangan UNISSA.

Merokok dan obesiti faktor risiko kanser

Siaran Akhbar : Kementerian Kesihatan

BANDAR SERI BEGAWAN, Jumaat, 3 Februari. - Menteri Kesihatan, Yang Berhormat Dato Seri Setia Dr. Awang Haji Zulkarnain bin Haji Hanafi menjelaskan dua faktor risiko besar yang terus menimbulkan cabaran kanser di negara ini ialah merokok dan obesiti.

Beliau menyatakan, 20 peratus daripada orang dewasa di Brunei adalah perokok dan ia adalah punca utama bagi hampir satu perempat daripada semua kematian akibat kanser.

Manakala, 61 peratus daripada rakyat Brunei mempunyai berat badan berlebihan dan obesiti (kadar tertinggi di ASEAN).

Tambah Yang Berhormat, kedua-dua, merokok dan obesiti dikaitkan dengan peningkatan risiko bagi beberapa kanser umum, iaitu kanser payudara, paru-paru dan usus. Berita baiknya adalah bahawa kebanyakan

dari kanser tersebut berpotensi untuk dicegah.

Menurut Siaran Akhbar Kementerian Kesihatan, ucapan tersebut terkandung dalam perutusan Menteri Kesihatan sempena Hari Kanser Sedunia bertema 'Kita Boleh, Saya Boleh'.

Malah, kira-kira separuh daripada semua jenis kanser boleh dicegah dengan menghentikan tabiat merokok; makan makanan yang sihat seperti buah-buahan, sayur-sayuran dan serat; mengekalkan berat badan yang sihat serta aktif secara fizikal dalam kadar intensiti sederhana bagi aktiviti fizikal selama 30 minit, lima kali seminggu.

Secara purata, kira-kira 600 orang di negara ini disahkan menghidap kanser setiap tahun dan ia menyumbang lebih 20 peratus daripada kematian. Data dari Kementerian Kesihatan menunjukkan

bahawa lebih daripada satu daripada empat orang Brunei akan didiagnosis dengan kanser dalam kehidupan mereka.

Menurut Yang Berhormat lagi, pada sudut yang luas, tingkah laku individu, seperti pengambilan makanan dan berapa banyak aktiviti berjalan kaki yang kita lakukan adalah dipengaruhi oleh faktor-faktor sosio alam sekitar.

"Oleh itu, kami menyeru rakan-rakan untuk menyertai kami, bersama-sama ke arah memperkasakan individu untuk membuat pilihan yang sihat. Program seperti inisiatif-inisiatif pilihan sihat di pasar-pasar raya dan premis-premis makanan; menu sihat di kantin sekolah dan tempat kerja; menggalakkan sukan serta program-program rekreasi dalam kalangan masyarakat seperti Bandarku Ceria adalah memainkan peranan masing-masing dalam mewujudkan *health promoting environment* yang membuat pilihan sihat sebagai pilihan yang mudah. Dalam aspek ini, kita semua mesti melakukan lebih dan

melakukan yang lebih baik," jelas Yang Berhormat.

Sebagai tambahan dalam kerjasama bersama para rakan di tahap polisi dalam mempromosikan persekitaran yang lebih sihat, Kementerian Kesihatan bersama Pusat Kanser Brunei terus meningkatkan perkhidmatan perubatan untuk para pesakit, terutama dalam memastikan pesakit yang disyaki menghidap kanser dirujuk kepada para pakar sebelum didiagnosis menghidap kanser lebih awal dan memulakan rawatan yang perlu dengan cara yang tepat pada masanya.

Ia adalah selaras dengan tiga keutamaan strategik kami, iaitu untuk meningkatkan kualiti penyampaian perkhidmatan; mencegah serta mengawal penyakit-penyakit tidak berjangkit dan untuk memupuk kesedaran bahawa kesihatan adalah tanggungjawab semua.

Kunci untuk membanteras kanser adalah dengan pengesanan awal. Alat-alat saringan kini tersedia untuk menguji beberapa jenis kanser termasuk kanser payudara dan

kanser serviks.

Ia adalah ujian yang mengesan perubahan awal kanser atau pra-kanser sebelum kami memastikan lebih lanjut akan gejala penyakit serta membuat rawatan lanjut yang lebih berkesan. Saringan boleh menyelamatkan nyawa dan kami mesti menggunakan alat tersebut dengan betul dalam usaha kita membanteras kanser.

Jelas Yang Berhormat lagi, bersempena dengan Hari Kanser Sedunia, cuba bayangkan bagaimana kita sebagai sebuah masyarakat dan individu boleh mengurangkan beban kanser di Brunei Darussalam. 'Kita Boleh' memacu untuk melahirkan persekitaran yang sihat. 'Saya Boleh' memilih kehidupan sihat sebagai pilihan dan memperoleh pengetahuan tentang saringan kanser. Selain sektor penjagaan kesihatan, pencegahan kanser dan pemantauan memerlukan setiap individu memainkan peranan masing-masing. Jangan lepaskan peluang untuk melakukan sesuatu yang positif hari ini untuk kita dan keluarga kita.



AHLI Majlis Mesyuarat Negara, Yang Berhormat Awang Mohimin bin Haji Johari @ Jahari, selaku Ketua Kampung Limau Manis Zon 5 (kiri) semasa mengadakan perjumpaan bersama para penghulu, ketua kampung serta Ahli-ahli Jawatankuasa Majlis Perundingan Kampung di bawah Zon 5.

Oleh : Wan Mohamad Sahran Wan Ahmadi
Foto : Mohd. Sahrizal Haji Said

BANDAR SERI BEGAWAN, Khamis, 2 Januari. - Ahli Majlis Mesyuarat Negara, Yang Berhormat Awang Mohimin bin Haji Johari @ Jahari menyeru para penghulu, ketua kampung serta Ahli-ahli Jawatankuasa Majlis Perundingan

Kampung di bawah Zon 5 supaya akan terus bekerjasama dengan beberapa pihak tertentu termasuk para pakar dalam bidang masing-masing seperti dalam latihan asas kepimpinan sara bina diri, latihan tanaman padi, latihan ternakan dan lain-lain lagi.

Ketengahkan isu beri kesan kepada negara

Satu kertas kerja secara komprehensif akan dibuat bagi memastikan program-program tersebut akan berjalan dengan secara profesional dan berkesan.

Perkara tersebut disuarakan oleh Yang Berhormat Awang Mohimin bin Haji Johari @ Jahari yang juga selaku Ketua Kampung Limau Manis semasa mengadakan perjumpaan bersama para penghulu, ketua kampung serta Ahli-ahli Jawatankuasa Majlis Perundingan Kampung di bawah Zon 5.

Yang Berhormat Awang Mohimin memulakan perbincangan dengan mengidentifikasi isu-isu dan permasalahan semasa yang memberikan impak, khususnya ke kawasan zon berkenaan dan secara tidak langsung memberi kesan pada negara.

"Setelah semua isu dan masalah dikumpulkan, kita akan mengadakan satu sesi perjumpaan lanjutan setelah Majlis Mesyuarat Negara, iaitu sekitar dalam bulan April atau Mei untuk mengenali isu-isu permasalahan yang terpenting dan membuat Pelan Tindakan secara terperinci sambil membuat penilaian yang benar-benar berkesan," jelasnya pada

permuazakaran berlangsung di bangunan Jabatan Daerah Brunei dan Muara, di sini.

Yang Berhormat juga menyatakan visinya, iaitu 'Mencipta Generasi Berkemahiran dan Berpendapatan Tinggi' dengan harapan dapat melahirkan generasi itu yang akan menyumbang mempertingkatkan ekonomi negara.

Selain itu jelasnya, dapat menangani masalah pengangguran dan bukannya hanya bergantung kepada sumber hasil minyak dan gas.

Menerusi program-program keusahawanan dan latihan kepimpinan bina diri, tambahnya lagi, akan dilaksanakan secara berperingkat setelah mendapat sokongan daripada pihak-pihak berkenaan.

Antara isu yang dibincangkan, termasuklah perkara yang berkaitan dengan hal ehwal belia dan perekonomian, pelancongan, pekerjaan, jalan raya serta perniagaan ali baba dan pekerja asing.

Dengan adanya permuazakaran seumpama itu serta kerjasama yang padu dari pelbagai pihak akan sama-sama dapat saling berganding bahu bagi merealisasikan Wawasan Negara 2035.

Sementara itu, perjumpaan sedemikian juga diadakan di antara Yang Berhormat Awang Naim bin Haji Kamis yang juga selaku Penghulu Mukim Kota Batu bersama para penghulu mukim dan ketua kampung serta Ahli-ahli Majlis Perundingan Mukim dan Kampung bagi kawasan Zon 3.

Semasa ditemui Yang Berhormat Awang Naim menjelaskan, perjumpaan adalah dihasratkan untuk mengetahui dan seterusnya mengenal pasti akan keperluan-keperluan yang dikehendaki oleh para penduduk kampung.

Di samping itu, katanya, untuk sama-sama merancang bagaimana membantu pihak kerajaan dalam menangani mempertingkatkan ekonomi negara dan rakyat khususnya.

Perjumpaan tambahnya, juga bagi membincangkan isu-isu keselamatan, kebajikan, pendidikan, pengangguran, kemiskinan dan pelancongan khusus bagi Kampong Ayer yang memerlukan perhatian yang sewajarnya untuk dihadapkan kepada pihak-pihak yang berkenaan dan seterusnya untuk disampaikan pada persidangan Majlis Mesyuarat Negara yang akan datang.